

CARTA OFICIAL NA GOBIERNO Y PARLAMENTO DI ARUBA ENTREGA DIALUNA 31 DI AUGUSTUS

Dunadornan di cuido ta bati alarma over di situacion financiero y den cuido na Aruba

1. Door di orden Hulandes pa corta 5 miyon mensual den gastonan di AZV pa bin na remarke pa e di dos tranche di sosten di likides, gobierno a duna AZV tarea pa corta den su gastonan. Pa esaki AZV a dicidi di implementa medida pa baha entradanan di dunadornan di cuido cu 11% cuminsando juli 2020 te cu december 2020. No tin claridad ainda si esaki lo conta pa 2021 mirando cu e crisis di COVID ta muestra di ta uno largo. E medidanan ta sinti su efecto den diferente forma incluyendo menos recurso pa paga gastonan fiho manera huur/hipoteca, pensioen, coriente y awa, pero tambe compra y importación di material medico y remedinan. Esaki tur mientras dunadornan di cuido a demostra solidaridat den e crisis actual door di entrega riba salarionan mensual.
2. Sector medico ta un sector esencial cu mester keda accesibel pa tur nos Arubianonan. Pa sigura esey Gobierno di Aruba a compromete su mes pa mantene acceso na cuido como un derecho universal pa cada ser humano via tratadonan internacional. Sin sector medico nos lo tin otro crisis na cabes cu complicación extenso cu hasta perdida di bida di ciudadano door di falta di cuido regular y COVID. Dunadornan di cuido durante e crisis di COVID a sigui traha cu alma y forza pa purba sigui brinda e mihor servicio posibel poniendo nan mes y indirectamente nan famia, personal y patientnan na extra riesgo di contagio cu COVID-19.
3. Diarazon 26 di augustus ultimo ora a sali un anuncio di AZV cu no tin likides disponibel pa paga tur dunadornan di cuido locual cu nan mester pa cubri nan gastonan. Nan a ricibi un máximo di 75% di nan entrada, esaki kitando caba e 11% cu a wordo corta menciona den punto anterior locual ta nifica un total 31.2% di rebaho. Esaki mientras gobierno a anuncia publicamente cu tin suficiente fondo pa cumpli cu obligacionnan financiero di pais Aruba te cu mitar di september y gobierno ta para responsabel pa cubri deficit den fondonan di AZV. Como consecuencia esaki ta causa cu tur dunadornan di trabow, incluyendo HOH, Imsan y boticanan no por cumpli cu tur nan gastonan y ta obliga di corta den e servicionan di cuido medico. Tur esaki ta trece cu nos salubridad publico ta den un situacion di peliger.
4. Ademas mester a constata cu sector publico pa luna di augustus ya a haña nan pago regularmente. Esaki ta pone duda significantemente unda e prioridad ta cu alocamento di e fondonan di sosten cu ta ricibi for di exterior. Na mayoria di pais internacionalmente cuido ta hañando hasta extra fondonan pa cubri nan gastonan extenso den tempo di crisis. Na Aruba prioridadnan ta muestra di

ta pa robes ya cu cuida ta ultimo den rij pa ricibi pago y hasta ta wordo corta adicionalmente pa augustus riba un rebaho di solidaridad ya caba existente.

5. Otro punto importante ta cu net awor cu tin falta di likides den caha di gobierno ta scohe pa por ehempel AZV Plus keda accesibel pa empleadonan di sector publico, esaki mientras henter sector publico ta wordo manteni door di e entradanan di sector priva cu aworaki ta pasando den temponan mas dificil ainda.

Pa proteha interes di salud publico, dunadornan di cuida y henter nos pais Aruba nos ta bati alarma pa duna un señal cla cu nos ta wordo horca y nos rosea a caba. Aunke nos ta compronde cu situacion ta dificil y ya caba a demostra di ta solidario door di acepta un corte significante den entradanan, sector di cuida merece un tratamento mas respetuoso den e situacion cu nos ta aden. Nos a manda varios carta di aviso over di nos preocupacionnan na AZV y gobierno y nos ta haña hopi lamentabel y decepcionante cu no a pone suficiente atencion y mester a caba den un sucedido incomprendibel cu e pagonan di luna augustus. Mirando cu situacion financiero ta critico nos no ta ni pensa kiko lo por pasa pa e lunanan siguiente si no bin nan un acuerdo cu Hulanda pa sosten financiero structuralmente.

Na e manera aki nos kier enfatisa cu bienestar di nos servicio di cuida a yega su punto critico y nos como dunadornan di cuida no por tuma responsabilidad mas bow di e condicionnan aki. Si no haña oido na nos exigencia y e sosten structural financiero no yega na sector di cuida inmediatamente nos lo wordo obliga pa tuma accion pa proteha interes di nos patientnan y e estructura di e sector. Esaki pa evita un colapso completo cu daño irreversible pa e proximo añanan.

Di e forma aki nos ta urgi Gobierno di Aruba pa yega na un acuerdo cu Hulanda inmediatamente den bienestar di nos salud publico y nos pais Aruba prome cu calamidadnan serio tuma lugar. Sin e sosten nos lo no por para responsabel pa e riesgonan y lo mester pasa e responsabilidad pa nos gobernantenan.

Sperando riba boso comprension, atentamente

Joaquin van Trig
Huisartsenvereniging Aruba (HAVA)

Babet Latour
Asociacion di Specialista Hospital di Aruba (ASHA)

Lindsey Tromp
Aruba Dental Association (ADA)

Marcel Meelis
Vereniging van Medisch Specialisten op Aruba (VMSA)

Marlon Maduro
Arubaanse Vereniging van Fysiotherapeuten (AVF)

Lennert van der Poel
Botica Vereniging Aruba

Xochimilca Weerts
Vereniging van Verloskundigen Aruba (VVA)

Jean Pierre Visser
JP Visser Orthopedie Technical Center